

**Meeqqat atuarfianni ikiueqqaarnerup fagitut pinngitsoornani ilinniarneqartussatut atulersinneqarnissaa pillugu Naalakkersuisut pequneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Andreas Uldum, Demokraatit)

**Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

**Siullermeerinnineq**

Naalakkersuisut Inatsisartunut ilaasortap Andreas Uldum-ip, Demokraatit, 6. klassinit qummut ikiueqqaarnerup fagitut pinngitsoornani ilinniarneqartussatut pissanganartumik naleqquttumillu siunnersuuteqarneranut qutsavigaat. Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit nalunaarummi maanna atuuttumi atuartut akullernit aninnginnerminni, tassa 4. – 7. klassimiinnerminni ikiueqqaarnermik pikkorissarsimasussaapput. Taamaattumik akullerni ikiueqqaarnerup inuup sananeqaataa timilu pillugit fagimi pinngitsoornani sammisaareerpoq.

Andreas Uldum-illi ikiueqqaarnermik ilisimasaqarluarnerup inuit inuunerannik annaassisarnermik kinguneqarsinnaaneramik taamaattumillu ikiueqqaarnermik ilinniartitsisarnerup angajullernut aamma atuunnissaanik isumaliuteqarnera Naalakkersuisut isumaqatigaat. Aammattaaq isumaliutigineqartariaqarpoq meeqqat atuarnerminni siusissukkut ikiuiumatussutsimik ilinniarnissaannik isumassarsiaq aallaavigalugu klassini minnerniilli ikiueqqaarnerup atorneqalernissaa naapertuunnersoq isumaliutigineqartariaqarpoq, tamatumani ikinngummut tuppallersaasinnaaneq aamma ikiueqqaarnermik ilinniartitsinermi ilaatinneqarsinnaalluni. Naalakkersuisut isumaqarluinnarput ikiueqqaarnermik siusissukkut ilinniartitsinikkut qinngasaarisarnerit uumisaarisarnerillu akiueqataaffigineqarsinnaasut, tamatumani sammisaq ajortumit pitsaasumut ikinngutiginnermut inoqatinillu pingartitsinermut saatinneqarsinnaalluni.

Naalakkersuisut ilisimavaat atuarfimmi atuaqatigiiaanut pingasunut tamanut ikiueqqaarnerup pillugu atuartitsissuteqareersoq. Taamaattorli Naalakkersuisut Inerisaavik qinnuiginiarpaat attuumassutillit allat, taakkununga ilanngullugu assersuutigalugu Kalaallit Røde Korsiat suleqatigaluguluunniit atuartitsissutaareersunik nalileeqqullugu immaqalu ikiueqqaarnermi atuartitsissutinik kalaallisuunik iluarsaarnermik nutaanilluunniit ineriartortitsinermik aallartitseqqullugu.

Taamaattumik ikiueqqaarnermik atuartitsinerup aamma angajullernut ilaatinneqartariaqarnera pillugu Naalakkersuisut siunnersuuteqartoq isumaqatigaat siunnersuullu Inatsisartuni partiinit akuerineqassappat sulissutigissallugu allannguutit Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit nalunaarutit iluarsaannissaanut ilanngunneqarnissaat. Sulineq tamanna Inerisaaviup aallartereerpaa, taamaattumik siunnersuut aningaasaliissutaareersut iluanni piviusunngortinneqassaaq.

Naalakkersuisut taamatut oqaaseqarlutik siunnersuutit akuerineqarnissaa inassutigaat.